



L'OME QUE PLANTAVA D'ARBOLS | JEAN GIONO
Traduzione in occitano alpino
di Rosella Pellerino

Progetto "L'Albero dei Pensieri"



Maggior sostenitore
Compagnia
di San Paolo

Con il contributo di
REGIONE
PIEMONTE

Con il patrocinio di
Grand Montaña
VALLE Maira

Lhi òmes porton lo charbon a la vila abo lhi camions, puèi s'en tornon. Las qualitats pus bònas se gaston sot aquesta continua dochia escossesa. Las fremas mitonon marsors. Lhi a concorrència sus tot, sia per vendre lo charbon coma per lo pòst en glèisa, per las vertuts que se fan la guerra, per lhi vicis que se fan la guerra e per la mesclura generala de vicis e de vertuts, sensa fin. En mai d'aquò l'aura, deco aquesta sensa fin, fai montar lo flin. La lhi a d'epidemias de suicidis e un ben de cas de folia, sovent assassina.

Lo pastre que fumava pas ero anat quèrre un saquet e avia vueidat s'la taula un baronet de glandas. S'era butat a las controlar una après l'autra atentament, en destriant las bònas das guastas. Mi pipavo. Lhi avio propongut de l'ajuar. M'avia dich que'era son afar, e de fach a veire lo suenh que butava ent'aquel travalh, avio pas insistut. Aquò era estaa tota la nòstra conversacion. Quora, dal cant des bònas, avia butat una bèla cucha de glandas, las avia dividuas en baronets de detz. Aquò fasent, triava encara lhi fruchs pichonets o qu'eron una brisa crepats, perquè lhi beicava ben dapè. A la fin, quora s'era trobat denant cent glandas perfiechas, s'era fermat e erem anats a cotjar-nos.

La companhia d'aquel òme paseava. Lhi avio demandat, per l'endeman, lo permès de m'arlamar tot lo jorn ent'aquò siu. Avia trobat la causa ben naturala o, mielh, m'avia donat l'impression que ren lo porguesse deranjar. Avio pas da manca d'aquel arlam, mas ero curiós e n'en volio sauber de mai. L'òme avia eslarjat lo tropèl e l'avia menat en pastura. Drant de partir, avia butat molhar dins un segelin d'aiga las glandas cernuas e comptas.

M'ero avisat que per baston l'òme portava una barra de fèrre espessa coma lo det gròs, lònja es quasi un mètre e metz. Avio fach moneta de far 'na promenada arlamanta, e avio pilhat un chamin que corria dapè al siu. Lo pastoral des feas era al fons d'una comba. Avia laissat lo chan a far la guardia a son tropelet e era montat vers lo pòst ente me trovavo. Avio paur que venguesse a arrochar-me per ma curiositat, mas non: aquel era son chamin e m'avia envitat a l'acompanhar, s'avio pas ren de mielh a far. Anava a dui cents mètres d'aquí, pi en aut.

